

晚

晴

移

詩

匯

晚晴謠詩匯卷三十六目錄

張英 九首

繆彤 四首

張玉裁 一首

董訥 二首

梅鎬 一首

紀愈 一首

顏光敏 十七首

何天寵 二首

汪懋麟 十一首

陳玉璣 二首

張鴻儀 一首

黃之鼎 一首

李默 一首

譚吉璵 二首

廖騰燿 二首

郭九會 三首

潘德徵 一首

張端亮 三首

井鑑 一首

張紫文 一首

張雲程 一首

曹鑑章 五首

李光地

三首

王揆

二首

張鵬翮

二首

趙申喬

四首

陸隴其

二首

蔡啟傳

一首

徐乾學

十一首

李振裕

三首

汪晉徵

一首

耿願魯

二首

趙文瑁

三首

陳夢雷

十首

林麟焜

十六首

曾華蓋

二首

吳瑾

一首

黃任

三首

王士祐

四首

郭琇

二首

邵嗣堯

一首

王無忝

一首

陳覲智

一首

葉燮

十二首

盧道悅

一首

樊初荀

一首

王庭詔一首

葛元福一首

晚晴簃詩匯卷三十六

徐世昌

張英字敦復號樂圃桐城人康熙丁未進士改庶吉士授編修官至文華殿大學士兼禮部尚書諡文端雍正初贈太子太傅有存誠堂詩集

詩話文端久直禁廷不忘邱壑嘗以樂天放翁自擬四庫提要稱其鼓吹昇平黼黻廊廟無不典雅和平至於言情賦景之作又多清微淡遠抒寫性靈臺閣山林二體古難兼擅乃兼而有之其詠風寫有云九霄日近增榮彩四野風多仗寶繩頌不忘規何等氣象擬古田家詩有云何必桃花源此境足蕭灑風塵久誤人我豈悠悠者又云面無憂喜色胸無寵辱情始知於陵子灌園逃公卿何等胸次

平陵宜山堂詩

我聞宜山堂結構平陵陽羣公爭賦詩佳詠皆琅琅何處最宜山奇峯出短牆石屋一片雲黛色映簷簷隔簾見幽

壑入戶飛層岡枯藤與古木掩映多奇光峯影落清泉水
面還蒼蒼何時最宜山山靜覺晝長朝霞與夕煙樹色分
微茫春明山翠濃夏雨山風涼明月出遠岫秋峯羣相望
何人最宜山先生稱古狂芒屨筇竹杖荷衣薜荔裳看山
無朝暮一卷或一觴手招西爽來披襟從徜徉斯景與斯
人是名宜山堂

枯松行

同沈康
臣作

慈仁古松樹蒼老不記年高下近十株爲態各自妍中有
雙龍鱗蟠曲香臺前松頂近可摩高枝纔覆肩屈彼百尺
勢空階恣蜿蜒橫側益奇絕影若蛟螭眠濤聲走平地雙
樹撐如拳似此蒼勁質止宜空山巔藉以一片石濯以清
淺泉謾謾響絕壑垂手招列僊何將故山態老卻車塵邊

橫遭厮養辱强索冠蓋憐冠蓋那復顧日落生寒煙一夕
風雨過萎黃何忽焉眾松失顏色臺殿增寂然惜彼凌霜
姿遽隨羣卉遷吾子勿復歎物各全其天

郊行

性拙寡所諧蚤歲歸田園籃輿游近郊指顧農家邨曖曖
茅茨接依依桑柘繁今年雨澤時耕穫及高原良苗懷好
風淺碧翻波痕歎彼耨耨者勞汗滴秋禾根我獨飽稻粱畢
世慚君恩

贈何匡山次梅邨先生韻

蚤年逸興在滄浪水國移家髮半蒼但有一經楊子宅曾
無千樹木奴莊清琴濁酒鶯花日雨笠煙蓑蟹稻鄉棠蔭
漸高身漸隱已將心事託漁郎

送錢飲光歸里門

湖海人歸已廿年卜居猶待賣文錢
欲諧禽向三山約須覓樅江二頃田
花雨紅時攜鋪往荷香深處抱書眠
翦鐙頻話家園好未遂滄浪意惘然

夏淺

身逐霜隲底事忙吾廬高寄水雲鄉
舊營花鴨三間屋新購谿橋十畝莊
邨繞綠疇偏衍沃峯圍紫翠總蒼茫
何緣卻向風塵老白盡髭鬚減盡狂

四郊雜詩

不須桃李鬪天斜底事芙蓉颭晚霞
最是野田芳草畔一枝閒澹女郎花

少小日長思隱几冬烘頭腦意難堪
一從失卻青青鬢始

覺人間午睡甜

星火西流節叙更簾痕新覺蚤涼生白楊葉上蕭蕭雨已
作秋宵第一聲

繆彤字歌起長洲人康熙丁未一甲一名進士授修撰
歷官侍講

送醫士方際泰歸茅山

賣藥長安市超然寄一身摺驢偏識路破襪不生塵入世
性情古還鄉面目真自慚留滯客對爾歎勞薪

萬族罹氛祲顛顛待此人戍兵屯戊己望雨急庚辛湯火
心徒切君臣劑有神能將上池水盡與濟生民

茅山稱最勝結屋傍嶙峋白鵠常爲伴黃精得養神松雲
涼夢寐童僕使麕麕曾讀宋清傳猶嫌未絕塵

東臺望海峯

層層峭石擁高臺就裏藤蘿百道開身在雲中天水合更於何處見蓬萊

張玉裁字禮存號退密丹徒人康熙丁未一甲二名進士授編修

寄題八公洞

蒼崖四圍合古寺中峯鑿徑窄飛鳥穿石陰虬龍攫躡躡恣野游一步一盤錯言尋最佳境修竹蔭幽壑倦卧當夕陽微風暗相薄別來經十載煙靄應如昨惆悵復春深無人自花落

董訥字茲重號默庵平原人康熙丁未一甲三名進士授編修官至漕運總督有柳村詩集

詩話默庵自總憲出督兩江時斯文襄督南河一意
興屯有司奉行不善奪民田爲屯地咨怨繁興宿遷
民尤苦之默庵疏請罷屯還民爲立生祠尋坐事
左授侍讀學士景陵南巡次宿遷祠當輦道民數
千執香祠前羅拜陳謝及還鑿默庵從諸大臣迎謁
景陵諭曰汝居官得民民爲汝謚一小廟因大笑
卽命復督漕運

興化道中

潏沆連滄海風吹一葉輕村從波際出草逼痕生地闊
無山影天空有鳥鳴最憐釜底處何日奏平成

移居清河茅舍

邑小無城郭零星二百家可憐同燕雀何處種桑麻藉火
聊分照荒檐任自斜往來工所近緩步踏平沙

梅鎬字爾熾宣城人康熙丁未進士由知縣官至左都

御史

水西古木

老樹自何年空潭鬱煙霧蚪幹插高天
低枝橫仄路託根白雲崖照影桃花渡
孤鶴巢其巔古藤屈相附蒼涼帝子宮
悵悵謫仙句

紀愈字孟起文安人康熙丁未進士歷官工科掌印給事中

茅齋春詠

西園春事早偶築卜城隈松徑幽篁細
藤溪野鳥來停雲雙白板步月一青苔
已悟逍遙理閒居賦可裁

顏光敏字遜甫更字修來別字樂園曲阜人康熙丁未進士歷官吏部郎中有樂園集

鄭則厚曰樂園五言原本三謝七古在李
頎杜甫之間近體秀逸深厚出入錢劉

詩話修來以詩鳴山左爲十子之一王阮亭謂施思
山吾鄉邇來英絕當讓此人其詩高華麗則格調老
成古體渾灝流轉今體秀逸絕塵五七言
如太華麥雨諸作蒼鬱雄高怪偉百態

登太華山

千尺峽

青柯圍翠屏四合無嵌竇東北窮石林劈空懸巨壑巉巖
互噴薄造化爭一候天矯轉蛇龍窅冥穿颺颺側聞天籟
發曠野雷霆鬬仰井窺秋旻浮雲裊清晝白帝觴百神衆
峯爲籩豆瓊臺阻且長翠葆紛何就

瀑布

谿迴硤角轉三峯面始正萬仞青琅玕瀑流下砰訇天逼
多烈風飄灑無時定細沫隨霧消大珠如星迸石罅昔未
闢停泓絕人徑時挹霄漢芬遙想菡萏盛誰使鴻濛開瑤

宮借涵映高蘿有垂猿登厯當與並

犁溝

犁溝劃絕壁直上無迴藏熊經復魚貫誰得相扶將危柯
裊撐拄修綆垂毫芒仰睇愁瞑眩況乃窮八荒昔夢逐化
人靈境空徬徨退身渺無地懦夫亦時强高林絕鳥雀萬
壑聞笙簫便合此中住彌年承玉漿

白雲峯

三峯信靈造巍巍司寇冠磊砢不盡洩蚴蟺復北盤結空
出瑤几前對香爐寒大道望如髮豁然見長安我行採山
蓀蔥蒨被岡巒秋色何時來萬里霜林丹三川富陳蹟八
水無停瀾玉女悵不顧目斷雙青鸞

擦耳崖

振衣更南登詭狀乃非一蟻行緣危棧逡巡皆股慄側身
常甌耳茹趾妨齧膝吹徑乾松花滴空熟崖蜜蕭滅無人
踪坐惜幽芳失昔聞避世亂雞犬喧雲日劫火燒咸秦遙
慨人代畢遺竈尙可尋終當置蓬室

蒼龍嶺

紆迴下平坡削成當左衝青霄嵐彩滅蜿蜒垂蒼龍修鱗
剝石薜高脊突劍鋒神物倏幻化雷雨愁相從玉京多欄
楯琪樹無春冬咫尺不可接勞心益慙慙危巢見炊煙下
界聞夕鐘相攜戒前路日暮崖霜濃

西峯

衆險厯已窮千盤墮幽渺西見青蓮花娟潔萬象表夕氣
收秦川蜃市競紛擾漸覺明霞昏忽訝繁星繞何年採芝

翁結廬出林杪陰壑應天難空階裂寒篠夢餘念疇昔纖
末俱了了願從叔卿游自顧浮生小

南峯

侵晨望南峯嵒巖更天半仰凌變寒溫俯視殊昏旦平岡
始徐立亭亭步鶴鶴游塵失秦隴微縷求沔漢亂山互糾
結豁然四奔竄敬傾如海濤決滌天爲岸驅馬過華陰豈
謂窮壯觀徘徊俯青池濯纓復三歎

東峯

東峯不可極乃知造化尊屹然鼎彝峙勢如虎豹蹲松氣
望蔚藍無人踐霜根巨靈拓太古高掌誰能捫晨光沒河
漢似有雲車痕陰風折秋花吹落洗頭盆蜃局念鄉國久
客傷精魂且復望虞淵散髮晞朝暾

游燕子磯

漾舟下澄江安穩廢輕楫遙空指蒼翠久行慚重疊石蘚
秋更荒皋蘭露猶裊孤亭四環望風磴遂屢躡盤渦鳬雁
驚幽窟蛟龍怙恐觸馮夷宮俯聽常震懾詰屈雙銀杏天
半垂黃葉波濤撼危巖栩栩亂風蝶東西吳楚間舳艫邈
相接鐵鎖沈千年金陵氣久厭蒼涼金粟堆時時見樵獵
鳳凰無遺音嶰竹誰更叶浩歌懷美人褰裳不可涉徬徨
江霧消斜日照城堞

麥雨歎

甯逢旱魃行莫見商羊舞小麥黃時賽田祖汗流肩頰何
太苦霏霏霪雨連三旬卻恨炎曦在何所昨日飛蛾空麥
頭今朝麥尾生黃牛

麥中蟲名

嘉實幾日作糠秕長饑更待

涼風秋勸農使者來省耘麥花布野揚苾芬豈知倉庾有
災眚翻嗔野老多傳聞頻年屢歉蒙寬假秋來併命鞭箠
下蛾兮牛兮何爲者覩然食我倉中粟何不往遮使君馬
戊申六月十七日齊魯地大震歌以紀之

冥海禺強立天門啄害下人乘夜昏耳間青蛇雙喫火蜿
蜒競與蛟螭奔穿窮地肺作陶復窾衍勢欲無崑崙大噬
羶羊細螻螳蒼生履厚徒惛惛千雷萬霆伏牀下發聲直
奪飛廉魂城郭跳踔金石走六幕八柱手可捫威斧怒劃
裂平壤幽光騰閃疑陸渾黃泉激水立千丈虹霓交射相
并吞踉蹌裸體走曠野摩挲大樹同鴟蹲荒雞不鳴狗亂
吠行衝南紀猶啍啍閭門漸返尋骨肉眼明喜見扶桑暎
恍疑中宵現妖夢一時慶弔忘饗飧共言巨鼃覆公餗縮

頸自請甘鉗髡高陵深谷瞥然改嶽瀆亦失公侯尊嗟爾
東人出兵燹版築未就三冬溫焚巫暴虺測天意疲氓忍
使瘡痍存西方雨雹大如象探丸篝火驚峯屯野人習見
尙云妄監門何得徹九閭三十年來增戶口祇愁庸調拋
兒孫村頭一夕徧燐火舊鬼煩冤安足論

送王考功西樵歸里

生不願封萬戶侯但願百歲無離憂遶牀呼盧醒復醉曹
騰不覺清商流向來思逐巫峽舟時阮亭使蜀君復垂翅歸齊

邱瀛臺荷花御溝柳何時快作聯鑣游憶昔神僊邈相接

紫騮並翦三花鬣同時卿相皆鴈行天人忽墮修羅劫迴
首刀碓夢猶怯放臣意氣凌荆聶大江白浪高於山歌笑

中流擲輕楫焦山古鼎龍烏文

焦山有周鼎山豪門西樵爲繪圖賦詩傳之今將復

往駿犂頗類王司勳蒼松綠蘚光不分結成縹渺空中雲
塵埋波滾不能没人間再出愁細縕江天安可無此君王
堂綺席何足云一官再罷客常滿長齋繡佛矜迂誕秋夜
漸長日苦短破除文字揮金碗忽睨蒼生肺肝熱銀瓶欲
上絲繩斷古來賢達皆轉蓬尼山片席何曾暖鮫人淚迸
明月珠可憐棄擲沈泥塗海水直下深萬里誰施鐵網求
珊瑚朝來日射黃金鋪鶴蓋成陰水接軫空勞天上懸冰
壺吁嗟歸休乎大夫

柴門

柴門無暑氣清興發今朝山雨乍連夜溪流初斷橋秧田
爭乳雀風柳厭鳴蜩便擬褰裳去輕泥漲未消

張茅

驛樹參差隴麥交微茫一徑是張茅河流繞地浮三晉山
勢連空結二峭雲外旌旗間古戍洞中煙火出危巢巖花
岸草空經眼那得他鄉有樂郊

潼關

連山覓路縱橫斷粉堞當空結構牢萬里河流蒲阪動九
天秋色嶽連高燕齊無計撓秦帝關隴頻聞唱董逃設險
當年隸畿輔廟謨親見紫宸勞

望華山

潼關西上見嵯峨路入雲臺佳氣多萬壑深松寒白日三
峯積雪照黃河天雞曉徹扶桑湧石馬宵鳴翠輦過擬向
青冥銷永夏蓮花玉井竟如何

何天寵字昭侯號素園宛平人康熙丁未進士官吏部

員外郎有紫來閣集

故園

故園殊可樂何意任飛蓬萬壑桃花雨千村竹箭風玉函
神禹穴翠嶂越王宮登岱應回首雞鳴滄海紅

歸義驛

岳陽路徑繞煙鬟擬見湘娥竹上斑一曲羅江千疊嶂雲
深何處九疑山

汪懋麟字季角號蛟門江都人康熙丁未進士官刑部
主事有百尺梧桐閣集

王漁洋曰君詩票姚跌蕩其師法在退之子瞻兩家
而時出新意稱詩輦下與田綸霞宋牧仲曹頌嘉丁
澹汝王幼華顏修來曹升六謝千仞葉井叔相唱和
號十子又詩話稱其詩才雋異古文學王介甫游
吳題寒山寺云吳中池館日吹簫只有寒山寺寂寥
幾樹江楓對漁火行人歸去雨瀟瀟題顧符祺畫云

昭陽顧生畫樓觀絳闕瑤房生白雲
如蠓宮人三百六丰神都似李將軍
詩話蛟門執贄漁洋門下詩多磊落使才稱心而言
不以修飾鍛鍊爲工自序初由唐人六朝漢魏上溯
風騷及官京師涉筆於昌黎香山東坡放翁之間體
乃稍變相傳有浯溪唐崖碑四十韻爲漁洋所稱而
趙秋谷非之此
詩不見集中

將入都留別于皇卽和見送原韻兼訂北游

霜風摧細菊寒雨颯高梧秋氣方搖落萍蹤竟有無于時
慙入洛投老羨歸湖日下思君切春來酒共呼

柳敬亭說書行

田巴旣沒蒯通死陸賈酈生呼不起後人口喫舌復僵雄
辨誰能矜爪觜吳陵有老年八十白髮數莖而已矣兩眼
未暗耳未聾猶見搖唇利牙齒小時抵掌公相前譚元說
鬼皆虛爾開端抵死要驚人聽者如癡雜悲喜盛名一時

走南北敬亭其字柳其氏英雄盜賊傳最神形模出處真
奇詭耳邊恍聞金鐵聲舞槩橫戈疾如矢擊節據案時一
呼霹靂迸裂空山裏激昂慷慨更周緻文章髣髴龍門史
老去流落江左間後來譚者皆稊秕朱門十過九爲墟開
元清淚如鉛水長安客舍忽相見龍鍾一老胡來此翦鐙
爲我說齊諧壯如擊筑歌燕市君不見原嘗春陵不可作
當日紛紛誇養士雞鳴狗盜稱上客璫璫爲替珠作履此
老若生戰國時游譚任俠差堪比如今五族亦豪侈黃金
如山羅錦綺爾有此舌足致之况復世人皆用耳但得飽
食歸故鄉柳平柳平譚可止

寄櫟園少司農兼送雪客歸金陵

讀畫高樓幾千尺樓陰下枕清谿碧面揖南朝無數山四

時雲氣生虛白先生捲簾樓上頭獨立看山自朝夕平生
好詩兼好畫尤愛圖書與金石購買不惜傾家貲盡是前
人好手蹟山川患難不肯離始信先生有真癖早年事業
多恢奇許身管葛千人辟已樹羊祜山頭碑再掌蕭何府
中籍豈意青蠅飛滿眼遂教白髮垂過額匹馬來看岱嶽
雲一官又返鍾山宅風濤宦海理有之何用嗷嗷罵門客
有書可讀詩可吟萬事徒勞挂胸膈人生甲子休浪過如
此朱顏亦堪惜世情翻覆原轉環況復長安事如弈我別
先生江水頭相逢令子燕山陌執手問訊何所爲卻道高
懷勝疇昔雄誇酒賦老益神傲兀林泉意多適側耳令我
發狂叫自顧胡爲苦偏窄此身一陷泥溝間巢鷺何能奮
毛翮君歸道我語家尊行路崎嶇半蠶螫心有馘氣口直

言那怪騰軒遭貶斥不如且酌春江萬斛水高築糟邱釀
仙液好待吾徒醉百場千秋萬世名何益

景帝廢陵

懊惱南城樹已荒何人封事築回牆當年若肯稱監國沒
世應須諡讓皇一穴龍髯終斷絕兩株荆樹起悲涼我思
季札真千古惆悵陵園曉色蒼

王子玠工部招游豐臺作歌

豐臺芍藥賤如菜千朵萬朵滿車載初出一枝猶十錢後
來一錢少人愛強半持上歌舞筵高低亂插銅瓶內紅英
紫萼賞者誰花入京師亦無態前年曾入豐臺游公子招
邀此其再下馬竟坐千花中匝地錦雲目茫昧初疑一脈
脂水流又如萬疊紅泉漑園官攜筐莽采摘摧折徒教發

深慨園官向余前致詞此地於今屬屯寨賞花送酒已往
事試勸游人且心耐停杯驅馬過短籬獵犬狺狺向人吠

題黃俞邨千頃齋書冊目

羲皇本多事橫空爲一畫遂爲文字祖後來紛簡策貽禍
到秦燄詩書受奇厄漢興稍搜輯殘缺良可惜作者東西
京自是競纂釋各爲一家言牛要幾千尺歷代有撰著純
雜理須闢勝國重淹雅名藩富經籍下逮學士家典墳亦
充積所嗟時文興古書相扞隔盈箱未必窺但取耳目赫
四海莽多故遺編毀兵革余嘗入三館顛倒觸履跡散亂
無全書飢鼠飽永夕牙籤悉斷割縹緗爲地席小胥閒盜
竊千萬無什百余欲叫九閭笑者頗嘖嘖執卷發長喟誰
爲共考覈歸來蓬戶下敝簾恣怡懌妄想宛委山漁獵快

夙癖但愁十指短難探海中璧古人目十行一覽不再釋
我讀未終卷記憶悔忙迫聰明天所限人事況役役意欲
專一經守約或有益藏書羨黃子塞屋地苦窄浩瀚六萬
卷丹鉛盡先澤父書既善讀而且保亂逆江山有變遷此
書無改易黃子固多才孝思實無射他時購遺書造君千
頃宅不須鼃錯來邊生吐胸膈發君四庫藏光蟬照金石
子綸員外招同諸公東河泛舟作歌

京東東門連夾城城上角樓頗高亢門外長橋跨大河轉
粟轟轟車萬兩上橋輪蹏莽縱橫爭門人畜互擊撞常時
送客扛籃輿跼步欹斜防跌踢今秋雨霽塵不飛田郎招
客泛清漲聽事臨流足松竹行廚及午陳脯醬翻匙一飽
循河干突兀方舟此游舫連檣結纜排米船繡緞紅氍作

行障緣隄最愛草樹齊逆浪還憐鵝鳴放岸邊亦有高下
樓朱綉青蛾出相望客謹船重風力微北地操舟如弄盪
長繩並逐青驢牽短篙漫憶黃頭唱五里一聞如面牆下
版橫波不肯讓聞東更有雙櫂迎日映簾泉屹相向歡情
爛漫履舄交主人大呼倒官釀一時供張阜隸趨吾徒顧
此神色王京朝之官人所榮池魚中鉤徒哢吭開元選勝
成故文妄想緡錢曲江上況復四郊暗戎馬咄嗟此游理
亦曠人生快意須目前車壁空捶朱雀桁諸君戀戀思繪
圖田郎推我寫圖狀忠恕精神雖未工和之大意我能相
寒宵放筆試縣菴指點谿山呼巧匠

錢武肅王祠

表忠觀倚聖湖邊壞道陰房劇可憐幾點土花香案上一

雙蝴蝶殿門前絕無宮監來澆酒時有游人此繫船吳越
蒙恩當戰鬪太平忘卻五王賢

湖上晚歸

昨日尋山下權遲湖亭人靜夜涼時朝來也自山中返碧
恨紅闌竟懶移

水上簫聲繞翠微晚風吹絮戀人衣無端催促城中去暮
雨吳山獨自歸

九日泛舟登平山堂同次功辰玉簫雲五叔定家兄
林木經霜葉仁飛百年難得此晴暉休嫌止酒心全減不
怕登山力尙微病後逢僧憐我瘦秋殘入寺覺人稀天南
眾壑青如許卻喜前時策杖歸

陳玉璣字賡明號椒峯武進人康熙丁未進士官內閣

中書

同友登京口避風館高閣望江題壁

袞袞登樓興披襟坐上頭果知天地大不盡古今愁孤塔
煙中斷諸峯波面浮憑欄一長嘯明月夜橫秋

落葉

木葉驚微脫相看惜故枝一秋今古夢萬樹別離思入水
飄無定隨風下每遲始知天地意搖落總無私

張鴻儀號企麓元城人康熙丁未進士官永和知縣

安陽道中次雪厓韻

野霧蒼茫裏寒砧遠近間溪明秋見石雲密樹連山木葉
經霜落漁歌倚櫂還何時倦行役小築自閒閒
黃之鼎號訥庵元城人康熙丁未進士

西園雅集

結客從蓮社攜琴過竹扉鶯花春欲老京國夢初歸檻曲
遲明月臺空落遠暉一尊堪永日莫自羨輕肥

李默字湖翁泉州人康熙丁未武進士官至肇慶總兵
有吹劍集

上谷晤林羽夫

昔年曾在薊門游歧路東西二十秋握手豈期驚喜半論
交轉覺別離愁風塵老大餘青眼書劍飄零笑白頭一憶
故園松菊冷歸心鄉夢兩悠悠

譚吉璫字左羽嘉興人康熙己酉舉人歷官禮科給事
中

詩話左羽爲舟石太守仲弟稱小譚大夫與竹垞中
表相友善膠書亭集中酬唱甚多然二譚皆無詩集

行世丹石猶有鴛鴦湖權歌與竹垞合刻左羽僅存
疏藁竹垞贈詩有云灘蟲何足尙辛苦羨名山殆其
志不欲以詩名也

弔戰場

祁連山下草寂寞少人煙魂魄千年後還思渡酒泉

寄懷維揚諸子

憶昔嘗北征挂席渡揚子鐵甕城邊王氣收三山明滅海
雲裏一夜西風入廣陵沸天歌地動蕪城千秋萬載傷心
地明月高樓酒自傾諸君意氣動南國甘泉山畔逢顏色
爲歌長鋏上君堂感君傾蓋開胸臆高堂滅燭正留賓燕
歌趙舞歡無極翠釜晶盤金叵羅珠簾綺閣映微波筵前
未歇蓮花舞道傍忽聽驪駒歌驪駒不可駐新知漸成故
楊柳落邗溝佳人眇天路江水東流北固高衝風駭浪難

飛渡男兒三十未成名今朝白眼向誰青萋萋碧草江南
陌兩度相思空月明

廖騰燐字占五號蓮山將樂人康熙己酉舉人官至戶

部侍郎有慎修堂詩集

詩話取逆之變蓮山遞迹山中物色之不得卒
以計獲免詩集分八草可見其立身行事之概

報恩塔

琳宮剏自報恩年突兀浮屠勢插天萬井鶯花隨地見九
層金碧半空懸遠波帆影秋風裏絕頂人行曉日邊最好
三更鈴鐸靜鐙光遙接大江煙

初入貢院行署

層樓遙望越王臺五月披襟亦快哉萬舍秋鐙鈴柝靜三
聲畫角棘門開昔同羣彥青衫至今擁中丞赤棒來四十

四年眞一夢冰壺滌筆有新裁

郭九會字繹茲猗氏人康熙己酉舉人官臨安知縣有
存齋草

燕山道中

燕地秋聲起辭家憶自春關山雲外道風雨夢中身客久
知金貴途窮覺僕親微名何足戀悔作遠游人

卽事

掃地勤童子開關憶故人車來花外月詩入甕頭春好事
耽幽僻忘機任喜嗔常疑青白眼終未避囂塵

重九前三日

休官莫道計全疏千載風流在遂初但使開籠放飛鳥不
須澉水活枯魚歸程預數三冬雪行李新添幾卷書白髮

倚閭勞望眼浮雲散盡見吾廬

潘德徵字道子貴陽人康熙己酉舉人由學正歷官武定推官署知府有玉樹亭詩集貧居集

三月十五日雨坐

地僻無嫌雨幽齋景自清萬峯煙際落一鷺蓼邊明吟苦神還逸身閒病亦輕晚來雲漸薄片月報新晴

張端亮字寅揆號退庵蒙化人康熙己酉舉人官澠縣知縣有撫松吟集

贈張漢冲先生村居

白髮先朝客丹邱處士家修筠屯古翠淺水籀迴沙篴啟留侯帙帆收客使槎一從高卧穩夢老赤松霞
不寐

鄉思濃於酒傾來詎易乾坐馳千里短愁結一宵難晚葉
吟風細秋砧搗夜寒不知天上月今夜爲誰圓

瓦角村山路見奇石

媧鼎何年潑餘汁化作猙猙神虎立風雷一嘯破溟濛山
鬼野狐應夜泣聳肩側視幾回癡百竅玲瓏琢削奇玉裂
冰紋苔繡鐵祇留皴法米家知高呼石丈石無語石若有
情應共吐何事空山老歲華暮迎秋月朝秋雨愛而不忍
便棄捐以手拍之聲鏗然誰信神奇有如此故令冷落伴
荒煙我不能談經令汝頭自點又不能大袖納汝避俗眼
振袍且下深深拜從此相思知不淺

井鑑字待庵文安人康熙己酉舉人官山海教授有半

學山房詩鈔

寒食舟中

春風江上柳如煙夾岸桃花遠趁船令節再逢寒食候灘聲不斷石橋邊布帆無恙隨流水明月多情媚遠天艤櫂清宵臨野寺不堪鐘鼓伴愁眠

張紫文字原質號集庭澂江人康熙己酉舉人有呈吹亭詩

晤錢鑑濤

亂世身還在遇方子再過幾年收涕淚此日話關河黔楚三生夢悲歡一曲歌肯來昆水上相共老漁蓑

張雲程曲沃人康熙己酉舉人

春日偕友人集坦園

老至耽春色浮生託醉鄉嬾師嵇叔夜癡學顧長康風柳

初垂檻山花遠映牆不須嗟濩落泉石足徜徉

曹鑑章字達夫號適園嘉善人康熙己酉拔貢官萬載知縣

贈魏交讓

君有鸞鳳質超逸青雲中高蹈齊彭澤達識比林宗閉戶
益著書草元追遺蹤雄采振大雅高音存古風況乃崇明
德寥寥誰與同層巖松檜林幽谷蘭蕙叢根幹同山川弱
植難自豐我懷景仰志師資良可通

楊白花

楊白花何不飛來卻飛去江南三月春草芳楊花飛去落
何處

楊花去不歸春風入絳幃含情不語日初斜愁殺江邊楊

白花

春洲曲

微波澣澣澄空碧紫陌春風漾春色誰家女兒出浣沙芳
洲驚起雙飛翼雙飛雙宿兩鴛鴦戲啄桃花錦浪香忽傷
蕩子無消息見此躊躇淚沾臆

送友人之山陰

客路斜陽外征帆去不停過江秋水白隔岸暮山青旅雁
霜前落哀猿月裏聽扁舟探禹穴幾日到蘭亭

李光地字晉卿號厚庵又號榕村安溪人康熙庚戌進
士改庶吉士授編修官至文淵閣大學士諡文貞有
榕村集

詩話文貞以經術事景陵易數歷律尤被契賞以
程朱之學成韓范之業立朝嶷然如古大臣當時譏

其賣友彈及奪情頗不嫌於異同之口要其存正論
全善類康熙之世自據亂入昇平自有贊襄之績固
不可厚誣也詩不甚
措意疑重稱其爲人

和京江相國西郊偕行原韻

長信曉鐘稀白露塗寒楚百執起居罷歸蹶亂禾黍裴公
未緣野卽辰懽嘯侶池荷明夏殘河楊結風緒誰忝京洛
行追陪慚馬呂提拂念衾裯傾輸忘齟齬席地醉香醪從
庖紛菜茹亮節當朝欽高標暇日舉芳音難屬和循誦祇
含咀

讀書有感

西土有虎賁於越聚君子不逾三六千國甲豈盡此此其
腹心者熊羆不二士然後億萬多無難臂指使我論讀書
方要道亦云爾汎濫同飄風精熟乃根底漢人重專經宋

人務窮理

榕村

卜築三紀前落成三紀後游宦如涉波邈不知其久榕樹
加遠條雜植頗陰黝澗水無消添稍復導源首抗榭觀遙
山闢亭通四牖前軒及南舍皆俯魯侯茆爲此將藏修不
量倡士友薄遽遂周星行復朝北斗匪我老未休命有驛
神守

王揆字藻儒太倉人康熙庚戌進士改庶吉士授編修
官至文淵閣大學士有西田集

詩話叟東王氏一門羣從並擅才華而藻儒名位特
顯晚年疏請建儲忤旨被譴仁廟實鑒其忠讜仍
以恩禮終詩名雖不及諸昆之
著而律句高華雄麗氣象特殊

虹友兄齋同漢槎夜話

海內爭傳季子名相逢執手喜還驚廿年塞外空歸夢一
夕鐙前似隔生鐵嶺風沙銷戰骨金河笳鼓駐雄兵知君
具有凌雲筆得藉陳湯返漢京

望岱

山色周遭信馬馳
峒岱宗高峙絕攀躋
龍嵒未許兒孫並
巖
嶂渾疑星漢齊
風定天門懸日月
雨收石角挂虹霓
他年定擬窮游屐
秦觀峯頭倚醉題

張鵬翮字運青號寬宇遂甯籍麻城人康熙庚戌進士
改庶吉士由刑部主事官至武英殿大學士贈少保
諡文端有張文端公集

詩話文端爲治河名臣不以詩著而行役之作
意境獨超不必與專家爭工字句間也

海船口夜泊

灝渺東風折柳條
濤聲天半別魂銷
蒼茫野色迷津岸
明滅魚燈趁晚潮
半枕易驚三峽夢
孤舟誰念一身遙
思鄉滴盡千行淚
愁聽哀猿倍寂寥

居庸關早發

誰道邊城景物淒
三更斜月早聞雞
光連古戍搖河影
寒逐清霜入馬蹏
龍虎臺高秋色迴
軍都山曉曙雲齊
天公有意憐行役
雨洗征塵路不迷

趙申喬字慎旃號松伍武進人康熙庚戌進士官至戶部尙書謚恭毅雍正元年追贈太子太保有趙恭毅公賸橐

詩話恭毅以在籍部曹召授浙江布政使感激馳驅遂由此始賸橐八卷附錄詩四十三首蓋非所究心也

洪都道中立春

搖落江城愧此身，驚心歲晚又回春。
窮年草土愁依舊，勝地風雲景漸新。
息浪乘流輕畫槳，負暄吹黍見村人。
但祈大有從今始，歸向溪頭擷野蓴。

歸舟

一棹乘流下蒼茫，雲樹邊歸心朝雨後。
客路夕陽前有夢，知何地無家欲問天。
半生飄泊處，應不受人憐。
關山豈歷徧，知己竟何如。
輕薄嗟行路，優游憶舊廬。
無心諂富貴，有意訪樵漁。
寂寂城東舍，誅茅願荷鋤。

庚辰仲冬內召感賦

七載投閒感聖恩，每親藥裹掩柴門。
充廷豈乏鵬行侶，下秩何當鳳綵存。
散棄自甘憐病骨，馳驅無計定驚魂。
小臣

進退甯須數微悃誰能籲九閭

陸隴其初名龍其字稼書平湖人康熙庚戌進士官靈
壽知縣行取四川道試監察御史贈內閣學士諡清
獻從祀孔廟有三魚堂集

詩話清獻學宗徽國文亦似之間爲韻語
皆粹然有德之言學者可終身誦之也

田家行

誰云田家苦田家亦可娛上年雖遭水禾黍多荒蕪今年
小麥熟婦子儘足哺所懼欠官錢目下便當輸昨夜府檄
下兵餉尙未敷里長驚相告少緩自速辜不怕長吏庭鞭
撻傷肌膚但恐上官怒謂我縣令懦傷膚猶且可令懦當
改圖陽春變霜雪爾悔不遲乎急往富家問倍息猶勝無
田中青青麥已是他人租聞說朝廷上方問民苦茶貢賦

有常經誰敢咨且吁不願議蠲免但願緩追呼

贈姚亘山

丈夫志四方此言須細詳四方雖云樂何如在家鄉況復多變態前途更難量網羅到處有不可不慎防所以先聖訓教人善行藏進禮退以義窮達視彼蒼滔滔雖皆是我必擇康莊人生貴知道豈必登廟廊君不見詩人拳拳十畝桑子陵老布衣咄咄勝侯王堯夫安樂窩至今仰耿光此中有真味難與世人商君誠熟反覆知吾言不狂

蔡啟傳字崑陽號石公德清人康熙庚戌一甲一名進士授修撰歷官左春坊左庶子有存園草

登齊雲洞天

壁立峯千仞雲開石徑斜樹身無歲月人影帶煙霞耳目

違塵事仙凡自一家前踪猶可問香飯等胡麻

徐乾學字原一號健庵崑山人康熙庚戌一甲三名進

士授編修官至刑部尚書有憺園集

詩話健庵遭際昌時躬被殊遇一時朝廷大著作多出其手尤以宏獎爲懷士林仰如泰斗晚去官仍領都亭擬挂冠入世艱虞憂履虎當門香馥柏鋤蘭一官雞肋中情澹萬卷牛腰遠道難最是君恩如海嶽禁庭回首涕洟又云陳情拜手出金屏祕閣縹緲許帶歸冠蓋同時都惜別吏人三館亦霑衣兒曹勉勵惟忠孝愛弟攜持共瘦肥此去只餘公論在平生那肯寸心違紀恩感遇意最深婉集中高文典冊多關掌故詩雖餘事要皆雍容寬博自然名貴此臺閣之異於山林也

公子行

翩翩佳公子容華耀朝曦門盛崔家戟家傳漢相尊弟兄才調俱第一六龍八駿何足論哲昆射策得高第少弟亦

邀天子恩連鑣俱過上林苑縱轡時經銅馬門銅馬門前
鋪繡塢五侯七貴多交結曾從複道入南宮還向建章過
北闕歸來寒拂紫貂裘銀燭金尊銷百憂美人燕趙迎歌
館狎客新豐上酒樓酒樓歌館迴波舞曲成便付梨園譜
雁柱銀箏樂未央鬢鬢娉容何嫋嫋行觴佇立久徘徊但
願公子朱顏開乍聽金梁鶯語細還看珠履雁行來雕輪
華轂無時絕子雲筆札君卿舌迴騎多過主簿家掃門要
使監奴說座中醉客轄偏投堂上留髡燭已滅鸚鵡遙遙
自隴西名花往往來南粵鸚鵡名花何處藏前頭廣榭後
雕房飛甍日麗鴛鴦瓦繡戶香悄翡翠牀寶融廢室自連
互馬防觀閣生輝光甲第雲霞雄帝里田宅膏腴滿故鄉
故鄉佳麗一相憶桂楫蘭橈來往亟伐鼓南來驛路迎揚

舫直下通津塞甘甯錦纜棄不收鄂君繡被歡無極玉津
園內鳥欲嘯伯通橋下人如織更植烏桺金谷旁常穿曲
沼芳林側據坐胡牀時疾呼曲韞綠幘平頭奴張翰善賦
周小史霍氏羣知馮子都橫行詎畏洛陽令爭道還欺上
大夫轉日迴天真莫比自言富貴長如此未誦應璩百一
詩甯曉寬饒切諫語尙冠里中鴟亂鳴廷尉門前雀棲止
梁松得罪豈無因張讓弔喪非得已霆雷倏忽下彤墀遠
戍窮邊悔已遲東朝語不聞都尉舊館人皆去魏其白髮
高堂猶議遺斑衣愛子盡相隨金闕迴看腸已斷玉關生
入夢堪悲陂田苑囿輸公府廝養髯奴向北陲安國灰然
那可待子卿羝乳竟何時從古豪華如轉燭奔車覆轍看
相續海魚有日困泥沙破巢之下無完族吾慕李子堅身

是司徒兒變名入公府不遣同舍知吾慕袁夏甫國相以
爲父謁吏不見通卻車更徒步古人高蹤不可求今人齷
齷難爲謀且漫垂鞭踏歌去白雲無盡香山秋

懷漢槎在獄

吳郎才筆勝諸昆多難方知獄吏尊誰爲解驂存國士可
憐一飯困王孫蟬吟織室秋聲靜劍沒豐城夜色昏聞道
龍沙方議譴聖朝解網有新恩

金谷

河陽金谷澗澗水尙潺湲當年開宴處臺館不復存緬想
石衛尉聲勢何煇赫海岱置郵符荆揚來賈舶蒼頭衣綺
裘侍婢遺朱舄錦障爛如雲珊瑚碎不惜造膝結賈謚望
塵拜廣成富貴可長保詎知禍患叟多財信爲累三歎涕

淚橫至今歌舞地蕭颯鵑鳴吾聞伏波言貴者可復賤
盈忡無定端瞬息市朝變錢幣甯禍人物聚理必散寄言
夸毘子豪華非所羨

博興

我行適青齊秣馬博興城城門晝常閉亭午無人行土室
築道周云是錦秋亭昔時游賞地零落存兩楹潯澤荒蒲
稗嚴冬結層冰狐狸竄荆棘鴟鴞羣悲鳴入城問父老歎
息謂苦兵博興數十戶廬舍悉已傾今茲二三載大守多
橫征府帖昨夜下搜括諸窮氓睥目一吼怒如聞虓虎聲
苛政不一端有土不得耕縣令賢且惠慙乃安其生不然
爲盜賊死重名正輕聽此策馬去惻愴難爲情

宿遷

柰葉從風滿路吹暮秋景色更淒其殘陽城角鍾吾國細
雨河邊項羽祠駐馬呼童沽濁酒下階攜客覓殘碑浮雲
西北連豐沛不盡英雄萬古思

贈友

十載江湖穩釣磯跨鞍絕塞欲何依草荒白帝家難問瓜
熟青門事更非述作千秋身未老悲歌萬里客將歸并州
風勁霜如雪送爾離亭淚滿衣

送座主孝感熊公省覲

孝感先生天人姿泰山巖阿長桂枝汪汪千頃標襟期橫
經身爲帝王師九重聖德今媯義時時召對銅龍墀殿高
語細人莫知下朝雙藤當戶搗焚香暝坐到日曉學也立
雪間披帷難字進問楊亭隈奧篇隱帙了不疑竊喜馬鄭

親規隨先生正色還相詆謂此章句胡爾爲淵源當溯洛
與伊慎勿誤蹈荀卿疵小子再拜敢自隳擬策驚鈍煩籍
鎚一朝北堂勞夢思拜表屢領天子頤建章日影搖采恩
溫詔暫許還南陲鋒車刻日來休遲敕賜天殿飛龍騎珠
鞍金絡光陸離道旁觀者爭歔歔更聞上林果纍纍赤瑛
盤爲高堂遺緋袍綵袖正相宜臣忠子孝兼得之古來盛
事誰如斯先生遭逢一何奇吁嗟乎先生遭逢一何奇白
華由庚和笙詩

分韻贈施愚山

海內風流屬鉅公青簾白舫五湖東來尋耆舊兵戈後徧
厯溪山暑暍中猿鶴難忘苑上宅煙霞欲號蔣陵翁蓬門
幸得高軒至長記琴壺一夕同

送待御念東先生

徵書昨歲遣蒲輪一載君恩許乞身萬里晴空餘老鶴五
湖浩蕩有潛鱗同時祖餞傾名士到處谿山訪異人卻笑
漢廷疏廣去賜金誇耀里閭頻

年光晚晚客情多白首尊前發浩歌天上歲星知曼倩人
閒居士問維摩久期汗漫游溟渤乍喜飛騰謝尉羅疲馬
蕭條灞陵路任他醉尉夜相訶

溫泉十六韻

靈液流芳甸溫濤注苑牆澤因儀鳳麗源爲濯龍長地脈
煙霄上天河日月旁甘分九華露潤浥五雲漿仙鼎偏能
沸丹砂本自香從官瞻豹尾遺俗問漁陽上善尊川后涵
虛讓谷王醴泉踰建武神水邁咸康黃屋山當牖蒼池石

作牀碧蓮開藻井翠荷接芝房聖母時來幸怡顏樂未央
蠲疴功莫尙駐老孝彌彰調劑中和氣淳涵紺潔光四時
常補益一節閭炎涼本不容瑕垢何妨示激揚濯磨思自
效精白奉吾皇

李振裕字維饒吉水人康熙庚戌進士改庶吉士授編
修官至戶部尙書有白石山房集

詩話維饒爲吉甫侍郎子母朱遠山夫人石園合集
仇儷唱隨維饒承其教臺省迴旋不廢吟詠

祝映碧先生八十

聖朝求舊廣蒲輪文獻千秋道自尊花以世家仍綠野瓜
因勝國戀青門壁中遺冊秦灰後柱下藏書魯史存著述
等身猶未了摩挲松老長靈根

止宿王山史山館

雲中白鶴自高翔有約衝寒到草堂
法物依然藏漢魏主人自在卧羲皇
藥苗入箸霏霏白橙子垂枝的的黃
絕似江南風味好琴書一榻枕滄浪

春田行

村花未放溪柳含春田霏霏曉氣酣
側身一望浩無涘不見田塍見湖水
遠樹疑搖雪浦中輕煙恍拂銀塘裏
湖水明鏡面平縠紋纔沒鞞紋生一
行雁影掠一片螺峯橫似水似非水
迷離澹沱移我情村叻戴簪荷鋤立
直訝漁師看風色可有津邊問渡人
鴨頭濃綠翻江國水亦不可畫湖亦
不可航春光駘蕩日漸長四月麥花
吹浪香

汪晉徵字涵齋休甯人康熙庚戌進
士官至戶部侍郎有雙溪草堂詩游西
山詩

南樓

庾公興不淺賓從滿高城何意南樓上依然秋月明清談
追往事好客見平生江外風帆遠登臨萬里情

耿願魯字公望號又樸館陶人康熙庚戌進士改庶吉
士授編修有韋齋集

送孔心一觀察之任粵東

三月旌旄下柳塘使君從此領炎方雙江權接榕溪近五
嶺雲橫梅驛長去路秋山鳴翡翠故人春雨夢桺榔鯨波
已息狼煙靜坐鎮還看化遠疆

新鶯

翠羽翩翩耀錦衣喬林經日戀春暉迴翔自有東風便不
向花陰冷處飛

趙文哭字玉藻號鐵源膠州人康熙庚戌進士改庶吉士授編修歷官侍講有粵游草

舟過峽江

人家寥落盡舟次夕陽間一水中分峽孤城半在山空天
聞虎嘯僻壤識民艱獨有飛飛鳥銜魚過艇閒
使還渡江而歸舟中有作

大江流建業畫舫趁春歸樹裏青山出洲前白鷺飛孤城
煙細細千里雨霏霏咫尺皆戎馬瀟湘未解圍

天氣行來晚扁舟下遠汀林深隱微火岸闊點疏星靜夜
三更冷長江一氣青欲尋人處泊戍鼓亂津亭

陳夢雷字則震一字省齋侯官人康熙庚戌進士改庶
吉士授編修有省齋遺藁

陳恭甫曰夢雷假歸會耿精忠叛徧羅名士幽繫夢
雷及其父於僧寺脅受偽官不得已厄瘠託疾以稽
之賊平議罪有陳昉者汚賊京師謫傳夢雷也復爲
逆黨徐宏弼誣告徵下詔獄幾不測朝旨減等謫戍
尙陽堡初夢雷與李光地通顯而夢雷方干嚴讞無以
亦在假用蠟丸密疏致通顯而夢雷方干嚴讞無以
自明引光地爲助光地密疏救之語載在國史本傳
夢雷不知故怨懟憤懣牢愁哽咽往往詭激於文詞
雖過其實然志足悲也在獄作抒哀賦間塞外十
餘年聖祖東巡盛京獻詩稱旨召還教習西苑侍
誠親王禁庭奉命編輯京獻詩稱旨召還教習西苑侍
正初復緣事謫戍卒子孫遂家遼陽
詩話省齋早以文章名世尤長古體所擬古詩十九
首及西郊雜詠絕工賜名世後誠邸以園林處之嘗感
疾淺色上賜以御筆書萬樹江邊杏新開一夜風滿園
入奏色上益憐之曰朕活之至此而三矣其
感泣宜也省齋有紀恩歌記其事載集中

華嚴嶺

五嶽峙方州臺峯爭鼎闢疊嶂凌空冥蒼茫煙霧隔東麓
聳華嚴奇兀分主客遠望但陰翳遠趾憚躡屐飄風怒崩

崖奔泉咽亂石徑轉漸窈深千尋列檜柏雜樹紛榛蕪衰
草互狼籍披荆厯磊砢天地忽迫窄羣巒相束縛嵯峨懸
峭壁林杪逗日光掩靄如將夕出谷謂窮際危峯尙如戟
其巔若可躋縈迴極盤蹕四顧寂無聲樵蘇不留迹落葉
墮空山如聞人咳噤草樹此俱枯窮寒絕地脈清非神明
都險實虎狼宅僕馬俱已疲停鞍聊躅躑俯視所厯峯點
點但空碧日昃下層岡遙遙度阡陌居人驚我來相問咸
踖蹻此山實奧阻往來道不惜驚獸恣吞噬壯夫亦裂魄
回首意悄然雄懷爲不懌丈夫志四方乾坤甯跼蹐登臨
戒高深步趨亦謹擇旣非事王程胡爲輕自適高堂方寸
心寒暑未安席履坦猶多虞聞此心魂圻戒哉人子軀無
事慎行役

海門行

南溟毒沫驅潛鰐跳浪揚髻繻漠漠夜半星飛白羽來腥
風吹斷海門鑰海門巖邑小如罌枕山砥澗六鼇擎五千
犀鎧濯龍鱗期門萬騎簇饒鉦誰柄長竿驚一蹶鉤沈餌
冷逐波月天塹不戒突矇矓孤壁煙寒炊鼠骨太陰壓營
城頭流殘角無聲聽泣鴟將軍碧血淬吳鉤飢烏日晏棲
骷髏秋老重泉氣未飭靈旗偃偃長蛇腹魂招不來馬革
枯酸心北向啾啾哭

華藏經堂阻雨

華藏經堂佛地尊晴光步去倏冥昏雷聲催雨千峯暗雲
氣沈山萬樹吞泉入急流添暗響崖懸新綠涇苔痕須臾
霽色饒清韻風捲松濤出寺門

東行口占

襖被登車謝九閭三年囚首一身存賤同廝養孤臣分生
到邊庭聖主恩籍削寄名歸卒伍魂銷憑夢返家園白雲
南向腸淒斷鶴髮東風正倚門

慷慨休歌行路難安排隨地聖恩寬牛車未免煩田老升
斗依然仰大官瘦骨可堪邊塞苦敝裘甯耐朔風寒臨歧
不灑傷心淚憂國當年淚已乾

風塵三載羽書馳填海曾聞精衛悲豈意上官專草檄翻
令巷伯歎南箕鑠金祇爲招羣忌投杼何當慰母疑行矣
帝鄉猶未遠還勝凝碧望闔時

上總憲魏環極先生百韻

聖世天心眷熙朝帝賚良太行高萃氣恆嶽遠鍾祥奕葉

任城裔宗風上黨昌經談新疏義樂賜舊宮商鶴跼琅玕
管龍雕錦繡腸書升多士慶臚唱五雲颺委珮趨鵲鵲簪
毫入鳳凰麟臺藜火燦鼇禁禩袍香特簡論思任先觀品
節剛紫垣封墨勅青瑣肅蒲囊道大容應寡心閑隱不妨
東山聊嘯傲泌水自徜徉家食聲逾峻疇咨典聿煌都人
欽碩德僚采式清望持斧南牀重升階白筆莊惠文騰鶚
隼驄馬避豺狼爰進崇班秩仍分秉憲行丰裁清柏署寵
擢錫銀章課績優三輔分猷振八廂軍需飛羽箭版部急
餽饘佐計煩區畫紆籌問積倉閭臣陳凱奏睿慮庶官常
特總烏臺綬頻縈蒼佩纓朝端升正氣輿論凜秋霜執法
宵垂耀熒精夜吐芒高平稱佐漢祕監美匡唐抑抑伊周
度雖雖金玉相泰階資鼎彝情廟寶圭璋愛國懷如負憐

才恐未遑後生多獎借謫學荷汪洋同志當年盛樂羣
事芳授書曾設帳問字許登堂邱垤欣山仰駑駘附驥驤
日歸辭几席貽贈富琳琅楚蜀驚隅虎蒼溟逞怒螳罽
悲雉觸矰繳滯鸞翔飲泣瞻宸座甘心赴國殤建旗孤羽
翼遜跡託緇黃方寸哀徐庶虞淵愧狄梁蠟書途梗塞雁
足信微茫隱忍拘囚辱蹉跎志節僵旣傷沈陷阱兼痛負
門牆召伯平淮服高宗靖鬼方披雲欣覲日席藁願衣桁
曠典憐凝碧殊恩宥夜郎感深懷更切遇蹙志難忘太傅
詞多激監門繪欲將九閭非易達尺幅乞垂詳南國闐鉦
鼓西陲缺斧斯當機迷勝算縱敵費張皇險棄魚鳧地防
疏鳥鼠鄉菱芻糜七澤弩矢鈍三湘癰養滇黔害烽連嶺
嶠創樓船稽掃蕩鮫鰐恣披猖棨戟韜鈴短荏苒嘯聚強

最憐中澤雁重作尾頰魴牧守紛漁獵閭閻竭筐篚兒螯
羅饋餼孥息啜糟糠以此薪延火堪嗟肉補瘡璽書寬越
尉鐵券慮懷光逸兇猶奔柙飛鴟豈食桑拔稂防引蔓削
毒制餘瘍蕃甲徵回紇金城護氏羌駝鞍驅翠珥毳帳擁
紅妝祇可金繒結甯堪子女償桀驁虞肘腋狡獪隱膏肓
宵旰邊庭患空虛內地戕繭絲窮蔀屋壁馬殫宜房饗餐
崇方岳鷹鷂布畛疆但聞增戶口誰念賑流亡塞下貴郎
監洛中賄道彰難言釐簠簋應自長蝨蝗人困疑情渙時
安幸歲穰卽今歌碩鼠深恐歎牂羊寒谷瞻朝旭窮荒企
帝閭鐸猶懸廣殿賦少諷長楊傳陸興臺耀平津邸閣張
封章仗馬寂車騎濯龍忙薰灌愁城社吹噓歎竈煬杞人
應有恨漆女自多傷砥柱資元老擎天藉棟樑近傳思漸

疏共喜股肱匡丹陛心方注蒼生望未央繡衣看赫奕
角倍鏗鏘本正末斯舉源清流自長持籌祛蠹急攘外撫
中康砥俗先廉恥端原始廟廊明聰開聖霽果斷振乾綱
次第修封事從容補袞裳絳騶威石室彩鳳噉朝陽瞻落
方州鎮樓泥戚畹莊清風彌宇宙化日掃欃槍謬謬真章
奏桓桓大贊襄人倫翹領袖國是壯金湯冀效芻蕘獻因
忘草野狂風謠陳記室掇拾備青箱佇晉絲綸席行紆經
緯藏萬邦歌保定六合架梯航殿陛輝干羽要荒入享王
鰕儒欣景運鼓枻詠滄浪

戊午春入都請罪施介平又韓追送江干詩以謝之
葩卉謝椿林幽篁挺清陰不歷寒暑節焉知君子心握手
少年交相期各忠厚噓沫幸相濡意氣復何有蓮會不可

常意氣自可長共濟涉波險咫尺不相將波險幸共越同
舟亦未覆手足不相藉忠信亦可睦天天桃李花榮落無
人妍疏者各飛揚親者强周旋周旋一何苦色態一何詭
恩深恐累深此道孰終古交君兄弟晚乃在亂離後堂上
有貧交入門多素友與君結識時心口無侈詞平淡終久
要今昔未參差春風吹江水客子心萬里追送江之干貽
贈馨如芷貽贈匪所珍所珍人意深君親師友恩念之涕
淫淫明發隔雲山相思日遼闊游子念高堂藉爾問飢渴
登清源山和蔡虛齋先生韻

攬勝同登萬仞顛凌風遙望海門天干家村郭羣峯繞一
片飛雲遠樹牽古寺僧還除蘚徑空山客到覓清泉東南
戰氣今應息詩酒何妨慶有年

贈山陰將陳中準

銅柱天南喜奏功，承恩飛將出雲中。
卻移浙水平潮弩，重試燕山飲羽弓。
畫角曉催龍首月，牙旗秋捲雁門風。
黃花嶺外烽長靜，緩帶輕裘好射熊。

林麟焜字石來莆田人康熙庚戌進士
歷官禮部郎中有玉巖集

詩話石來與汪舟次皆漁洋門下士漁洋嘗序其集
偕舟次奉使琉球歸裝有竹枝詞一卷舟次亦輯中
山沿革志采風俗
備輦下傳鈔殆徧

琉球竹枝詞

手持龍節渡滄溟，璀璨宸章護百靈。
清比胡威臣所切，觀風先到卻金亭。

徐福當年采藥餘，傳聞島上子孫居。
每逢卉服蘭闥問，欲

乞嬴秦未火書

日斜沙市趁墟多村婦青匳藉綠莎莫惜籌花無酒盞人
歸買得小紅螺

三十六峯瀛海環怒潮日夜響潺湲樓西一抹青林裏露
出煙蘿馬齒山

射獵山頭望海雲割鮮桐酒醉斜曛紙錢挂道松楸老知
是歡斯部落墳

廟門斜映虹橋路海鳥高巢古柏枝自是島夷知向學三
閭瓦屋祀宣尼

王居山第兔園開松樾櫻花倚石栽多少從官思授簡不
知若箇是鄒枚

奉神門內列鵷行乞把天書鎮大荒喚取金滕開舊詔侏

倚感泣說先皇

闕宮薨桷歷山原將享今看幾葉孫
二十七王禋祀在釐
圭錫尙見君恩

譯章曾記祚都夷槃木白狼歸漢時
何似島王懷聖德工
歌三拜鹿鳴詩

宗臣清俊好兒郎學畫宮眉十樣妝
翹袖招要小垂手簪
花研帽舞山香

望仙樓閣倚崔嵬日看銀山十二回
笙鶴綵雲飛咫尺不
教弱水隔蓬萊

纖腰馬上側乘騎草圈銀釵折柳枝
連臂哀歌上靈曲月
明齊賽女君祠

久稽異域歲將徂自笑流連似賈胡
三老亦知歸意速時

時風色相桐烏

塔山觀牡丹

催放鼠姑花信風
錦茵銀燭照鞦韆
紅何當澹月慈恩寺
傳徧新詞到六宮

品題國色總尋常
姚魏爭誇壓衆芳
不是宣和翻舊譜
何人解賞女眞黃

曾華蓋字乃人號
喟哉廣東海陽人
康熙庚戌進士由
知縣歷官吏部員外郎
有鴻跡猿聲楚游征車諸集
河口晚望

渡口堪晴望
閒行踏輦莎
夕陽鴉背滿
秋意雁聲多
野樹然紅葉
村籬蔓碧蘿
晚來清吹發
漁笛起滄波

南安樓寓

陌上杏花殘樓頭春色闌愁隨芳草徧夢入雨聲寒作客
風波苦依人嗔笑難自憐雙鬢影三月滯南安

吳瑾字開士一字璞懷孝感人康熙庚戌進士歷官刑
部員外郎有紫石山房詩集

客舟

一自辭微祿蹉跎又四年客舟無故舊跋涉有山川樹色
斜陽外溪光倒影邊楚山望不極樽酒向江天

黃任字志伊號遜庵元城人康熙庚戌進士歷官刑部
主事有坦齋詩鈔

單父

不見宓子賤空登單父臺玉琴已絕響鴻雁有餘哀杼軸
南人困河渠東國災春風催解陳處處尙蒿萊

人日寄杜少汧朱

微風晴影散花甌社鼓儺歌動野煙春到柳邊纔七日人
懷河上已經年伍山芳草堪憐後瓠水桃花未發前好著
一鞭來草舍莫教愁對絮漫天

移枕

落紅飛絮滿繩牀移枕清陰背草堂向午夢回山鳥亂隔
牆風送菜花香

王士禛字叔子一字子側別字東亭山東新城人康熙
庚戌進士有古鉢山人集選

王漁洋曰山人幼沈默寡言笑讀書好深湛之思爲
文章刻深窈窕不取悅時目嘗夜雪集東堂同和輞
川集得句云日落空山中但聞發樵響考功驚歎游
吳興與宋荔裳嚴武伯葉元禮共賦五言詩成諸公
閣筆以爲孟襄陽微雲澹河漢之比吳江計甫草論
之曰三王並著詩名西樵阮亭早達故聲譽易起若

東亭之才詎肯作蜂腰哉世以爲篤論

同舍弟和李退庵侍郎讀水經注憶洞庭之作

相思何處折芳馨望斷黃陵舊日亭秋水依稀聞落葉楚天彷彿見揚靈洲邊子戌三春綠樓外君山一帶青太息雲中君在否不堪重問道元經

賦得揚州早雁

隋隄煙柳尙參差目送寒蕪見雁時浦樹驚秋零暮雨江樓橫笛起涼颺爲辭霜雪輕千里此去瀟湘近九疑回首故人經歲別楚天搖落重相思

閣上坐雨望敬亭

樓外青山碧四圍盪胸雲氣欲沾衣愁中碧草侵階長望裏春禽接翅歸閑倚枯藤清興極漫傾濁酒賞心違蒼松

翠篠空如畫
招悵煙嵐屐齒稀

早過奔牛

楓葉蕭蕭露氣清
菰蒲獵獵早潮生
扁舟跂腳聞風水
便有長江萬里情

郭琇字瑞卿號華野卽墨人康熙庚戌進士由知縣官

至湖廣總督

詩話華野初令吳江明敏決果力除積弊入爲諫官
時高江村王橫雲諸人倚眷遇不愜於眾望特疏劾
之直聲震一時後督湖廣坐事罷
歸卒年七十有八吳江民祠焉

大行太皇太后輓辭

彌留鸞馭日
遏密萬方齊
地慘冰封樹
天寒雪作泥
鳳歸
嶺北月落薊城西
天子居廬久
煙迷柳外隄
樞星不復見
猶自戀慈帷
撫有河山勝
長含風木悲璇宮

香未散珍膳視無期依舊春光徧青芝發九枝

邵嗣堯字子昆猗氏人康熙庚戌進士由知縣歷官參議道

谷口觀雲

萬壑晨雲白聯翩出岫扶不知爲雨後還到故山無

王無忝字夙夜孟津人康熙庚戌進士由行人歷官金華知府

秋日游龍潭寺

習靜尋山寺息心戒恨游雲藏嵩嶽樹水泛孟津舟聽梵
來龍母鳴鐘靜不樓佛奴好相伴來往入高秋

陳見智字體元號力庵曲阜人康熙庚戌進士歷官金華知府

虎牢關

百戰成皋地中原第一關大河迴九曲少室互重山風雨
嶠函外人煙鞏洛間往來憑眺處回首已蒼顏

葉燮字星期號橫山嘉善人康熙庚戌進士官寶應知

縣有已畦集

沈歸愚曰先生初寓吳時吳中稱詩多宗范陸究所
獵范陸之皮毛幾於千首雷同矣先生著原詩內外
篇四卷力破其非吳人士始多訾謗之歿後人轉多
從其言者王新城司寇致書謂其獨立起衰應非漫
許

詩話橫山爲東強項與陸清獻同被劾去官遂居吳
中其詩不屑隨俗作甜熟語甯拙毋巧漁洋歸愚皆
盛推之絕句尤多絃外之音如詠梅花開至九分云
祝汝一分留作伴可憐處士已無家又題扇畫松云
憑君棄置秋風後常在笥中
耐歲寒兀傲自喜孤懷如見

題平湖沈客子燕京春詠後

京洛何妨擁鼻游欺他富駱闕銀鏤景龍新敝鸞臺署底
事雲卿衣故裘

殘杯忽憶帝城春曾逐輕蹏十九人淮上黃蘆江上雪憑
君說是賞花辰

送王阮亭宮詹祭海還朝

使節天邊轉韓碑讀罷還挹泉酬主眷探袖出民艱帆沒
依依樹裝輕箇箇山南枝留不住高詠過重關

瘞壁恭成事祠壇異碧雞蠻方流雅樂玉陛返桓圭激水
從天上扶桑向使西聖朝嚴俎豆到日拜封題

從萬杉寺循麓迤邐而東過開先寺始見瀑布注爲

龍潭入山第一大觀也

崖傾松風奔石斲苔花溼迎我一片雲瞻前已後失珠宮

東叢巒交倚競鍛植萬株千尺松陽鳥畏其逼陰森雨忽
飛出林仍杲日震霆雲木間舉首驚電疾閃爍九日落界
空無階級疑投玉女壺將無天漢溢噌吰萬石鐘笙竽聲
并一一一旋溼雲大珠小珠逸忽折墮陰崖澎湃漱巨屋
蛟龍鬼神來視聽爪髮慄何來鄉里兒大書石上刻陳陳
汚巖竇山林遭辱墨愧無酬名山惟有長太息

登五老峯自一峯二峯至中峯最高處

長江萬里岷蜀來彭蠡派匯天南回巨川交叉東宇宙廬
山握紐眞雄哉左攬江流蜿蜒如盤帶右銜湖影濺激如
螺杯攬帶銜杯昂鉅首俯視古今王侯將相無異蜉蝣與
塵埃昔年我登日觀峯秦皇漢武如夢中往者又登天子
鄣軒轅鍊丹無乃妄又曾一登太室顛北邙漠漠迷林泉

無如此老蟠踞襟帶亙天下我今直上睥睨目欲無全天
初登一峯峯猶邈十步九折舉堪趾二峯初登峯削成老
猿卻步狙公驚中峯纔上見全楚九點齊煙何處所謝朓
驚人不足誇靈均欲問將無語君不見干戈萬戟蹲舞跪
立羣少年擁衛老人支頤兀坐厯瞬黃農虞夏忽沒焉入
海空聞不死藥山頭一息長緜緜雲衣千族絢異彩流泉
百道華池在烏兔長供無盡鑑舉頭把臂蒼蒼宰廬山面
目是耶非百轉千回非所思縱饒筆底廬山句不是當前
面目詩

山半有
老人峯

答林西仲

著作窮愁寄此生風波悟得死生情
西仲在閩
瀕死者數也知李廣
功名薄不爲虞翻骨相清繡嶺斜陽傷立馬斷橋斗酒悵

聞鶯明朝解纜遙天際別館瓊花好聽箏

西仲別去
往揚州

京口作

朔風動地大江鳴猶說南徐北府兵鐵鎖幾人籌異代布
衣終古悔成名江山無限漁樵計木葉頻驚關塞情試上
高樓憑四望不禁淚下愧平生

楊花

小蠻腰瘦不勝情斷粉飄雲殢舞裙莫便漫天飛不住樓
中尙有未歸人

循北山歷虎跑登南高峯

壁峭悟徑窮巖開忘蹊轉雜篁修澗鳴幽葩石棧展逶迤
不知疲曲折互迎遣啾啾鷓鴣雞音呦呦磨麋纂朝曦躍重
湖晶光淩絕巘谷窅響易哀林委指靡顯迅瀑激木末笙

鋪互流衍窮瀛攬帶間懸象措掌辨輕舉諒爽期沈憂藉
暫免知音貽同懷良貺豈云淺

春日泛湖登孤山

曉策遵蘭渚挈侶揚方舟舟行遡晨晷偕我翔中洲輕陰
散浮嶼澄漪碎孤邱幽懷戛世慮冥契倦前修褰衣度石
澗攝袂憑山樓荒祠臨迴波磴道折淳流緒風搖叢綠溥
陽感鳴鳩遙渚蒲漸生周塗蘭已稠攜我言懷侶景昔抗
志傳女蘿穆修風梁木邈難求喟焉理歸榜去矣心遲留
同德清徐方虎錢塘張步青東陽趙湛卿登永嘉江
心寺浮屠

鷺宮兀突捫銀河界破青冥一雁過名士登高雙淚下故
人回首萬峯多新傳蜃海銷兵甲若箇漁磯卧薜蘿尺五

去天知不遠憑君才調問如何

盧道悅字喜臣號夢山德州人康熙庚戌進士官偃師知縣有公餘漫草清福堂遺藁

相國寺舊石

一官七載餘三來相國寺入門孤石存慷慨笑相視歎此磊落材沈埋清淨地抑鬱歸僧房精靈入夢寐修髯偉丈夫長揖就客位氣象旣軒昂言詞復清利感君見愛深爲君說遭際家本大江東來自宣和歲維時久太平君王尙游戲園囿象山林窮工極點綴西北獻蒼鷹東南貢翡翠徵求及閭閻草木皆爲累乃隨花石綱挺身入大內重瞻顧之喜聲價邁儔類曾下米顛拜遂入清流隊王蔡勢烜赫莫能相招致承恩曾幾時滄桑出不意童貫開邊釁滅

遼失長計金人遂渡河長驅無所忌二帝繼蒙塵邦昌竊
神器恐被僞命污空門暫逃避初非愛金仙跡與心相背
謂我事浮圖賢者苦責備悠悠五百年永爲世人棄所望
有心人破格相磨礪載歸上苑中依然堪位置斯言感余
心頓下窮途淚方圖傾所懷梵鐘驚午睡

樊初荀字佚沁水人康熙庚戌進士

龍泉寺

龍泉巖上寺杏谷日邊霞夜瀑晴巒雨春鐙白雪花磬浮
松月小關掩嶺雲賒仄徑穿林細輕煙拂樹斜東風遲暗
草暝色滯飛鴉慧遠溪前路樵蘇數十家

王庭詔字宣子夾江人康熙庚戌進士有耕餘集

寄家書

一函游子淚痕封寄去雲山幾萬重君到鶴洲江上望數
椽茅屋幾株松

葛元福字嚮五號謙齋德平人舉人官當塗知縣有種
花主人橐

秋日東郊

霜飛九月楚江清閒眺溪山別有情鷗鷺幾行依浦岸松
杉一片送秋聲寒煙漠漠疏林碧微雨涓涓落葉輕日暮
歸來荒徑曲石田回望野雲平

曉起

起看庭前花漸欲舒紅萼不嫌緩緩開但願遲遲落

晚晴移詩匯卷三十六終